

entsteen. Nach seinem absterben sein dise nigromantische
bücher seinem enkl, dem römischen kaiser Ferdinando, wor-
den. Derselbig, besorgendt, das villeucht seine nachkommen
sich derselben missprauchen mechten und dadurch in unfall
5 komen, hat er gehandelt als ain weiser kaiser und hat die
verbrennen lassen.

**In disem capitel werden erzelt etliche guete schwenk,
so umb dise zeit zu Marggraven-Baden, auch zu Möss-
kirch sich verloffon.**

10 Mittler weil als herr Johanns Wernher bei marggraf
Christoffen zu Baden am hof, hat sich neben anderm ain
lecherliche sach begeben; dann als herr Johanns [387] Wern-
her und Renhart von Neunegk aines abents spaciert, sein
sie allain ohne ire diener in die herberg zum Salmen der
15 zeit, wie man zu nachtessen phligt, gangen, und als sie nie-
mandts gesehen, haben sie sich abzogen und sein in ain
kasten, den sie ohn geverdt offen gefunden, in ain ange-
macht bad gesessen. Nun hat aber denselbigen kasten ain
doctor von Augspurg bestanden gehabt; der ist nach dem
20 essen sambt seim weib und ainer gewachsenen dochter, die
das liecht voranher tragen, widerumb zum bad gangen, und
wie der die zwen, die er nit gekennt oder gewisst, wer die
seien, in seim bestandt, dem kasten, ersehen, ist er ganz
undultig und übel zufriden gewest, derhalben mit rauchen
25 worten sie weichen haissen, dem sie aber nit gleich statt
thuon wellen. Hat der doctor ain stab, den er in henden
getragen, ufgehbt und uf sie schlagen wellen. Hierauf herr
Johanns Wernher, auch Renhart von Neunegk im bad ei-
lendts also nackendt und ohn alle niderwatten ufgestanden,
30 hat Renhart den grosen zapfen im kasten erwischt und
aufszogen, und wie der doctor gebaret, als ob er schlagen
mit dem stab, hat Renhart im mit dem hulzin zapfen zu
werfen getrawet. Indessen der doctor vermerkt, das sein
weib und die dochter anfahen zu pfuttern und zu lachen,
35 und gesehen, wie die beide also unverbunden im casten
ufrecht gestanden, ist er noch mehr erzürnt worden, hat
der dochter das liecht usser den henden gerissen und eilendts
fluchendt mit den seinen wider darvon zogen. Herr Johanns
Wernher, auch Renhart haben sich darnach nit lang ge-